

والله وكبرت



والله وكبرت...

وعجّزت يا واد

والعشق ف روحك

بقى مَيَّه وزاد

عائش على حلمك

عصفور متشعبط

في خيوط الشمس

بتطير وتعدي السور

وتحس العالم بقی همس

وأغاني في ليالى النور

..

والله وكبرت...
وعجّزت يا واد
جوّاك الهمة
في العشق بتجري
وبتلفّ بلاد
لسّاك في العشق صغير
متعافي، ولسّاك بتغير
والغيرة ف دمك دخانة جير
بتبان على وشك
وكانك بتقشّقش عَشّك
بتلفّ وبتدور شبه المحتار
مش قادر تعقل
ما انت المملوك والمالك

والعشق اللي بيملأ خيالك

بقى هو الليل اللي بيسهر

يستنى الفجر

بقى هو البحر

بقى هو الموج

اللي بسافر بسنين العمر

بقى هو الدقة

وشراع المركب

وانت البحار

..

العشق يا ولدي...

ما يجيش بالصدفة

ولا يقدر يهرب

العشق يا ولدي...
في الأصل ضمير
لا ينام الليل..
ولا حتى نهار
مش قادر تتقل وتداري
وتخبّي مشاعرك
ما انا عارفك..
ملهوف متشوّق
الشوق اللي منور عمرك
ومكمل بيه المشوار
..

الغيرة.. يا ولدي
حجرين في رحايا

وبتطحن حَبّات النار

..

مع إنك في العشق مرايا
على وشك تفاصيل لحاية

وكل الناس بيقرّوها

سطور الأشعار

ما هو قلبك

ما في هوش أسرار

..

والله وكبرت...

وعجّزت يا واد

وعزائمك في العشق شداد

ولسّاك جَوّاك يشبه برّاك

مش قادر تتغير
الكون في عينيك
م الأصل صغير
الغيرة يا ولدي..
في العشق هلاك
ما انت اللي رضيت بالعشق
ولا تقدر غيره تختار